

LA CARTA DEL APOSTOL SAN PABLO A LOS GÁLATAS

¹ Che co jae Pablo. Che co jae Jesucristo jemimondo. Cuimbae reta'ã cheparavo, jare cuimbae reta'ã chemondo. YandeRu Tumpa jare Jesucristo chemondo. Tumpa umbijecove ye Jesucristo güeru umanocue vae reta ipite güi. ² Che jare opaete yanderivi che ndive ñugüïnoi vae reta nduicuatía cua tupapire opaete pepurugüïrovia vae reta Galacia rupi piyembatimbati vae pe. ³ YandeRu Tumpa jare yandeYa Jesucristo tumee peve ipiacavi jare ipiacatu. ⁴ YandeYa Jesucristo uñemee umano vaerä yanembaeyoa reta re, yanderepi vaerä teco icavi mbae vae ivi pegua güi. Echa'ã cua co jae yandeRu Tumpa jei vae. ⁵ YandeRu Tumpa tuyembiadoraca jaeño mai pegua. Amén.

Ñee icavi vae pentiño co

⁶ Chepiacañaí ete quirai imambae ete piyembopiaca Tumpa güi perovia vaerä iru ñee icavi echa vae. Echa'ã Tumpa peparavo Cristo ipiacavi rupi. ⁷ Ërei mbaeti co iru ñee icavi vae. Jaeño ime amocue pembopa vae. Echa'ã jae reta uipota perovia vaerä iru ñee icavi echa vae ñee icavi vae Cristo regua ipepica pe. ⁸ Ërei numimbeu ma peve ñee icavi vae. Jare ime yave quía iru ñee icavi echa vae umimbeu peve vae - ore yepe ani penti ángel ara güi ou vae yepe - Tumpa tuyapo mbae icavi mbae vae chupe. ⁹ Cua co tenonde yave ndoe ma peve. Ërei añave amimbeu ye peve. Perovia co ñee icavi vae. Ime yave quía iru ñee icavi echa vae umimbeu peve vae, Tumpa tuyapo mbae icavi mbae vae chupe. ¹⁰ Aipota'ã etei ivi pegua reta chembutuicha vaerä. Aipota Tumpaño

GÁLATAS 1:11 2 GÁLATAS 1:23

chembutuicha vaerā. Aipota'ã etei vi ïví pegua reta uyemingueta cavi vaerā checoti. Echa'ã aipota yave mona ïví pegua reta uyemingueta cavi vaerā checoti, ndarau tēi ayeyocui Cristo pe.

Quirāi Pablo uyeyapo Jesucristo jemimondorā

¹¹ Ërei aipota picuaa vaerā, cheríví reta, cua: Cua ñee icavi vae che amimbeu vae ou'ã co cuimbae güi. ¹² Echa'ã mbaeti penti ave cuimbae umimbeu cheve. Ayemboe'ã etei jese cuimbae güi. Jaeño Jesucristo uicuaaca cheve.

¹³ Pe reta picuaa ma quirāi judío reta iporomboe re che aicose. Echa'ã ayapose jeta ete mbae icavi mbae vae Tumpa uiparavo vae reta coti, jare aipota tēi opa amicañi.

¹⁴ Jare judío reta iporomboe re cheratangātu ete jeta cherentaigua cheaveigua reta güi. Echa'ã cheratangātu ete chetenondegua reta iporomboe re. ¹⁵ Ërei Tumpa cheñono tee iyupeguarā ndei chesi güi aa mbove, jare cheparavo ipiacavi jeco pegua. Jare jae uipota ma yave,

¹⁶ uicuaaca Taí cheve, che amimbeu vaerā judío mbae vae reta pe. Cua uyeyapo yave, ayemingueta'ã jese quía ndive. ¹⁷ Aa'ã vi Jerusalén pe Tumpa jemimondo reta tenonde Tumpa omondo chegüii vae ñugüinoi vae pe. Ërei aa Arabia pe, jare joco güi ayu ye Damasco pe.

¹⁸ Cua jaicue rupi, mbapi año uasa ma yave, aa Jerusalén pe ayemingueta vaerā Pedro ndive, jare apita jae ndive quince ara. ¹⁹ Ërei aecha'ã penti ave íru temimondo. Jaeño aecha Jacobo - jae co yandeYa tivi. ²⁰ Mase, cua aiciuatía peve vae añete vae co. Tumpa uicuaa catu añete vae co.

²¹ Cua jaicue rupi aa Siria jare Cilicia pe. ²² Jare Cristo re güirovia vae Judea pe uyembatimbati vae reta checuaa'ã, cherecha'ã ramo. ²³ Jaeño jae reta uyandu jei cuarâi: "Jocua cuimbae icavi mbae vae uyapose yandeve vae añave umimbeu mburugüirovia tenonde yave uipota tēi

opa umicañi vae.” Jucuarāi uyandu jei. ²⁴ Jare umbiadora reta Tumpa chereco pegua.

2

¹ Cua jaicue rupi, catorce año uasa ma yave, aa ye Jerusalén pe Bernabé ndive, jare araa vi Tito. ² Jare aa, Tumpa uicuaaca cheve aa vaerā ramo, jare amimbeu cavi chupe reta jocua ñee icavi vae amimbeu judío mbae vae reta pe vae. Ërei amimbeu rani itenondegua reta peño. Echa'ã aipota ayemingueta cavi jae reta ndive, jae reta uicuaa cavi vaerā jocua jecuaeño amimbeu vae. ³ Jare ipuere'ã quía umicircuncidaca Tito che ndive oĩ vae, yepe tēi jae griego co, ⁴ jare yepe tēi amocue mbaeti añetete upurugüirovia vae reta uique viari orepite pe. Echa'ã uipota uecha viari quirāi ra nduico. Echa'ã uicuaa reta ore numimbeu co quirāi Cristo Jesús oreyora ma mboroyocui güi. Echa'ã uipota tēi nduico ye vaerā mboroyocui re. ⁵ Ërei nuñemaeño'ã etei jese reta. Echa'ã nduipota jecuaeño penoi vaerā ñee icavi vae añetete vae.

⁶ Ërei itenondegua uyembutuichaca echa vae reta ipuere'ã etei umiñru ñee amimbeu vae ndive. Yepe tēi tenonde yave uyembutuichaca reta co, Ërei jocua uipota'ã jei mbae cheve. Echa'ã Tumpa uau'ã penti vaeño ñru vae güi. ⁷ Ërei jae reta uicuaa ma Tumpa umee co cheve amimbeu vaerā ñee icavi vae judío mbae vae reta pegua, Pedro pe umimbeu vaerā ñee icavi vae judío reta pegua umee rami. ⁸ Echa'ã Tumpa omondo Pedro ico vaerā jemimondorā judío reta pegua. Jae ramiño vi jae chemondo aico vaerā jemimondorā judío mbae vae reta pegua. ⁹ Jáeramo uicuaa reta ma yave quirāi Tumpa umee cheve ipiacavi, Jacobo, Cefas jare Juan - jae reta co itenondegua echa vae reta - chépopisi jare uipopisi vi Bernabé, uicuaaca vaerā penti rami co noĩ, jare ore

ndoo vaerā judío mbae vae reta pe, jare jae reta yugüiraa vaerā judío reta pe. ¹⁰ Jaeño jei reta oreve oremandúa vaerā iparavete vae reta re. Ërei che etei aipota ete ayapo jucuarāi.

Pablo umbijeco Pedro Antioquía pe

¹¹ Ërei Pedro ou yave Antioquía pe, chupe etei ambieta, teco güïnoi ramo. ¹² Echa'ã ndei amocue judío reta Jacobo güi yugüieru mbove, Pedro ucaruñoi judío mbae vae reta ndive. Ërei yugüieru ma yave, Pedro ucaru'ã ma judío mbae vae reta ndive, jare opou'ã ma ipi. Echa'ã uquiye judío reta güi. ¹³ Jayave ūru judío reta vi uyemboe Pedro jeco re, jare uyapo reta jae uyapo rami. Jáeramo Bernabé vi uñemaeño chupe reta, uyapo vaerā jae reta uyapo rami. ¹⁴ Ërei aecha yave uyapo'ã jupi añete vae ñee icavi vae pegua rupi, che jae Pedro pe opaete vae jovaque: “Yepe tēi nde co jae penti judío, ërei ndico judío mbae vae reta yugüireco rami, ndico'ã judío reta yugüireco rami. Jáeramo ¿maera pa ndipota judío mbae vae reta yugüireco vaerā judío reta yugüireco rami?” Jucuarāi jae chupe. ¹⁵ Ore mbaeti etei co judío mbae vae reta - mbaeyoa pegua ndoe chupe vae. Ërei yepe tēi ore co jae judío reta etei, ¹⁶ nduicuaa ndarau quía ipuere uyembujupica mboroyocui jei vae re uyapo vae rupi. Jaeño ipuere uyembujupica güirovia yave Jesucristo re. Jáeramo ore vi ndugüirovia ma Jesucristo re nduyembujupica vaerā mburugüirovia Cristo re nonoi vae rupi, nduyembujupica'ã mboroyocui jei vae re nduyapo vae rupi. Echa'ã ndarau quía uyembujupica mboroyocui jei vae re uyapo vae rupi.

¹⁷ Jare nduipta yave nduyembujupica Cristo re, ore vi nduyecuaa mbaeyoa pegua reta. Ërei yepe tēi nduyecuaa cuarāi, ërei Cristo oreapo'ã etei co mbaeyoa pegua retarā.

¹⁸ Echa'ã aipota yave ayapo ye jocua ambai vae, añete co

che ayeyapo mbaeyoa peguarã. ¹⁹ Mboroyocui jei vae rupi amano ma co. Jáeramo añave che co jae penti umano ma mboroyocui cotí vae rami. Jare jáeramo añave chepuere ayeyocui Tumpa pe. ²⁰ Cristo umano curusu re yave, che amano vi jae ndive. Jáeramo aicove'ã ma, jaeño Cristo icove chepia pe. Jare cua ivi pe aico rambueve, aico co mburugüirovia Tumpa Taí re anoi vae re. Echa'ã jae cherau, jare uñemee umano vaera cheré. ²¹ Aríro'ã Tumpa ipiacavi. Echa'ã mboroyocui jei vae re yayapo vae rupi yandepuere yayembujipi yave mona, Cristo umanoñota tẽi.

3

Mboroyocui ani mburugüirovia

¹ Galacia pegua reta, pe reta co jae iyaracuaa mbae vae reta rami. ¿Quía pa pembitavi, agüiye vaerã perovia añete vae? Echa'ã perovaque etei amimbeu cavi ma quirai Jesucristo uyecutu curusu re. ² Cuaño aipota pemimbeu vaerã cheve: ¿Pembiresive pa Espíritu Santo mboroyocui jei vae re piyapo vae rupi, ani ñee icavi vae piyandu yave pepurugüirovia ramo? ³ ¿Pearacuaa'ã etei pa co? Pe reta pembipi Espíritu Santo rupi. ¿Piñemimirâtata pa pe retaiño pepuere piyapo vae rupi? ⁴ ¿Piporaraiño ma pa jeta mbaembae? Quirai mona agüiye piporaraiño. ⁵ Tumpa umee peve Espíritu Santo, jare uyapo miacañi reta pepite pe. ¿Uyapo pa cua mbaembae mboroyocui jei vae re piyapo vae rupi, ani ñee icavi vae piyandu yave pepurugüirovia ramo?

⁶ Jucuarai vi Abraham güirovia Tumpa, jare Tumpa umbujipi ipurugüirovia jeco pegua. ⁷ Jáeramo picuua co cua: Mburugüirovia güinoi vae reta co jae Abraham taí reta rami. ⁸ Tumpa iñee pe uyecuatía oí ñee icavi vae Tumpa umimbeu Abraham pe vae. Tumpa umimbeu

chupe ndei uyeyapo mbove. Echa'ã jei Abraham pe cuarāi: “Nde rupi opaete ivi pegua reta amivendiseta.” Jucuarāi jei chupe. Echa'ã Tumpa uicuua ndei uyeyapo mbove quirāi umbujupita judío mbae vae reta ipurugüirovia jeco pegua. ⁹ Jáeramo Tumpa añave umivendise mburugüirovia güinoi vae reta, Abraham umivendise rami. Echa'ã Abraham vi güinoi mburugüirovia.

¹⁰ Opaete uipota uyembujupi mboroyocui jei vae re uyapo vae rupi vae reta jecuaeño teco güinoi. Echa'ã Tumpa iñee pe uyecuatía oĩ cuarāi: “Tuyembijeco toĩ jocua jecuaeño uyapo'ã opaete uyecuatía oĩ mboroyocui itupapire pe vae.” Jucuarāi uyecuatía oĩ. ¹¹ Echa'ã yan-depuere yaicuua quirāi mbaeti penti ave ipuere uyembujupi Tumpa jovaque mboroyocui jei vae re uyapo vae rupi. Echa'ã Tumpa iñee pe uyecuatía oĩ cuarāi: “Tumpa umbujupi vae güinoita tecove upurugüirovia ramo.” Jucuarāi uyecuatía oĩ. ¹² Jare mboroyocui mburugüirovia pegua'ã co. Echa'ã Tumpa iñee pe uyecuatía oĩ mboroyocui re cuarāi: “Ime yave quía cua nunga uyapo vae, icota uyapo ramo.” Jucuarāi uyecuatía oĩ.

¹³ Mboroyocui yanembijecose. Ërei Cristo yanderepi ma chugüi. Echa'ã jae uyembijecoca yandepepica pe. Echa'ã Tumpa iñee pe uyecuatía oĩ cuarāi: “Teco güinoi jocua uyecutu curusu re vae.” Jucuarāi uyecuatía oĩ. ¹⁴ Jare cua uyeyapo Cristo pe, Tumpa umivendise vaerā Cristo Jesús rupi judío mbae vae reta, umivendise Abraham rami, jare yande ñanoi vaerā Espíritu Tumpa jei umeeta vae yandepurugüirovia jeco pegua.

¹⁵ Cherivi reta, tachemiari peve cua ivi pe mbae uyeyapo vae re. Iví pegua reta penti trato uyapo yave uyupe, yepe tēi ivi pegua retaño co, ndarau quía ipuere umbai, jare ndarau quía ipuere mbae umíru jae ndive.

¹⁶ Cuarāi vi Tumpa jei umeeta mbaembae Abraham jare

iñemoñaa pe. Tumpa imiari'ã iñemoñaa reta re. Echa'ã jucuarái yave mona, uipotata tēi jei jeta vae. Ërei imiari iñemoñaa re. Echa'ã cua uipota jei penti vae. Jare jocua penti vae Cristo co. ¹⁷ Jáeramo che jae peve cua: Tumpa tenonde yave uyapo penti trato Abraham ndive, jare uicuaaca chupe añetete vae co. Jayave cuatrocientos treinta año uasa ma yave ramo, Tumpa umimbeu mboroyocui. Jáeramo mboroyocui ipuere'ã umbai jocua trato. Echa'ã umbai yave mona, Tumpa ndarau tēi uyapo jei uyapota vae. ¹⁸ Echa'ã mboroyocui re yave mona Abraham güinoita Tumpa jei umeeta chupe vae, ndarau tēi güinoi jei uyapota vae re. Ërei uyeyapo co Tumpa jei uyapota vae Abraham pe.

¿Maera pa uñemee mboroyocui?

¹⁹ Jayave ¿maera pa uñemee mboroyocui? Uñemíru co mbaeyoa reta jeco pegua, jocua Abraham iñemoñaa Tumpa jei umeeta vae ou regua. Jare Tumpa uicuaaca mboroyocui Moisés pe ángel reta rupi, Moisés uicuaaca-yuapi ye vaerã Israel pegua reta pe. ²⁰ Jare uicuaaca-yuapi ye vae oĩ mocui vae ipáu pe, uicuaaca-yuapi ye vaerã penti vae güi íru vae pe. Ërei Tumpa co jae pentiño.

²¹ Ërei mboroyocui oyovaicho'ã etei co Tumpa jei uyapota vae ndive. Echa'ã tecove uñemee yave mona mboroyocui Tumpa uicuaaca vae re, añetete co mboroyocui upurumbujupita tēi. ²² Ërei Tumpa iñee pe uecuatía oĩ vae uicuaaca opaete vae iyoa co, Tumpa jei uyapota vae uñemee vaerã mburugüirovia Jesucristo re güinoi vae reta pe. ²³ Ërei ndei ndugüirovia Jesucristo re mbove, mboroyocui güinoise mbaepuere oreré, penti peresoriru iyandarecoa mbaepuere güinoi pereso reta re rami. Jare mboroyocui güinoise mbaepuere oreré, Tumpa uicuaaca regua ndugüirovia vaerã Jesucristo re.

²⁴ Jáeramo mboroyocui oreyandarecoa rami vi co. Jae uyandarecose oreré, Cristo ou regua orembjupica vaerã mburugüirovia rupi. ²⁵ Ërei güïnoi'ã ma mbaepuere oreré jocua uyandarecose oreré vae. Echa'ã ndugüirovia ma Cristo re. ²⁶ Jare opaete pe reta vi Tumpa tai reta co mburugüirovia Cristo Jesús re penoi vae rupi. ²⁷ Echa'ã opaete pe reta piyembibautizaca ma piyeyapo vaerã Cristo jete peguarã. Jáeramo pe reta piyeyapo ma penti ramíño Cristo ndive. ²⁸ Cristo Jesús re uyuaví'ã uyupii judío jare judío mbae vae, uyeyocui vae jare uyeyocui mbae vae, cuimbae jare cuña. Echa'ã Cristo Jesús re opaete pe reta penti ramíño co. ²⁹ Jare pe reta co jae Abraham iñemoñaa reta rami. Echa'ã pe reta co jae Cristo imbae. Jáeramo pembae co jocua Tumpa jei Abraham pe umeeta vae.

4

¹ Ërei che jae peve cua: Penti cuimbae umano yave, tai güïnoita tu imbaembaecue vae sambiai ico rambueve, oyovaque penti uyeyocui vae ndive, yepe tẽi opaete mbaembae imbae ma co. ² Echa'ã omboe vae reta jare uyandareco jese vae reta güïnoi mbaepuere jese jare imbaembae re, jae uepití regua iaño tu amiri ndei umano mbove umimbeu vae. ³ Jae ramíño vi tenonde yave moromboe ivi pegua mbaepuere güïnoi oreré. Echa'ã jayave nduicose jocua sambiai rami. ⁴ Ërei ou ma uvæ yave ara, Tumpa ombou Tai. Jae oa cuña güi, jare mboroyocui güïnoi mbaepuere jese, ⁵ jae ipuere vaerã uepi mboroyocui güïnoi mbaepuere jese vae reta, ore orepuere vaerã nduyeyapo Tumpa tai retarã. ⁶ Jare tai reta ma pe reta pico ramo, Tumpa ombou pepia pe Tai iEspíritu. Jae jei: “CheRu, cheRu.” ⁷ Jáeramo pe reta uyeyocui vae reta'ã ma. Pe reta co jae Tumpa tai reta. Jare

tai reta ma pico ramo, Tumpa umee vae pembae co Cristo rupi.

Pablo ipiatiti upurugüirovia vae reta re

⁸ Añete co, tenonde yave picuaa'ã Tumpa yave, piyey-ocuise tumpa-raanga reta pe. Jae reta mbaeti etei tecove güinoi. ⁹ Ërei añave picuaa ma Tumpa, Tumpa pecuaa ma ramo. Jáeramo ¿maera pa pipota perovia ye moromboe reta ivi pegua? Echa'ã güinoi'ã mbaepuere pembori vaerã. ¿Maera pa pipota güinoi vaerã mbaepuere peré? ¹⁰ Echa'ã piyandareco pei ara reta re, yasi reta re, fiesta reta iara reta re jare año reta re. ¹¹ Chepiatiti ete peré. Echa'ã chepia pe ayemingueta aramoi aparavíquiiño ma pepite pe.

¹² Cherivi reta, pumiñera piyapo vaerã che ayapo rami. Echa'ã che ayeyapo peírurã. Mbaeti etei mbae icavi mbae vae piyapo checoti. ¹³ Echa'ã pe reta picuaa co quirái chembaerasi jeco pegua tenonde yave amimbeu peve ñee icavi vae. ¹⁴ Jare yepe tẽi chembaerasi, ërei chereríro'ã jare chemitarët'ã. Echa'ã pe reta chembiresive cavi. Penti ángel Tumpa güi ou yave mona pepi, pembiresiveta tẽi jucuarái. Jare Cristo Jesús ou yave mona pepi, pembiresiveta tẽi jucuarái. ¹⁵ ¿Maera pa penoi'ã ma jocua yerovia penoise vae? Echa'ã chepuere amimbeu peregua cua: Pepuere yave mona, peequita tẽi peresa piyugüi, pemee vaerã cheve. ¹⁶ Che amimbeu peve añete vae. Cua uipota'ã jei ayemboyovaicho ma pe ndive.

¹⁷ Jocua pembopa vae reta jatangätu ete peré, ërei icavi'ã peve peguarã. Echa'ã uipota pembopia oregüi, pe reta peratangätu vaerã jese reta. ¹⁸ Ërei icavi jecuaeño peratangätu vaerã icavi vae re - mbaeti pepi aï yaveño. ¹⁹ Cherivi reta, penti cuña uiporara imembi oata yave vae rami che aiporara ye ma aï Cristo jecove uyecuaa vaerã peré. ²⁰ Aipota tẽi aï vaerã pe reta ndive añave, jare

aipota'ã tēi pumingueta vaerā cuarāi. Echa'ã chepiacañi ete peré.

Umijaanga Agar jare Sara

²¹ Pe reta pipota mboroyocui güinoi vaerā mbaepuere peré. Pemimbeu cheve, ¿picuaa'ã pa mboroyocui pe uyecuatía oĩ vae? ²² Echa'ã Tumpa iñee pe uyecuatía oĩ vae umimbeu quirāi Abraham mocui tai güinoi. Penti tai cuña uyeyocui vae imembí co, jare ūru tai cuña uyeyocui mbae vae imembí co. ²³ Jare jocua uyeyocui vae imembí uñemoña cuimbae jei vae jeco peguaño. Ërei jocua uyeyocui mbae vae imembí uñemoña Tumpa jei ramo. ²⁴ Jare cua co penti jaanga. Echa'ã cua cuña reta uyemijaanga jocua mocui trato re. Penti trato co jae ivitú guasu Sinaí jee vae re uñemee vae. Cua trato pegua reta co jocua oa uyeyocui vaerā vae reta rami. Echa'ã jucuarāi vi co Agar imembí. ²⁵ Echa'ã cua Agar uyemijaanga ivitú guasu Sinaí Arabia pegua re, jare uyemijaanga vi tenta guasu Jerusalén cua ivi pe oĩ vae re. Echa'ã jocua tenta guasu Jerusalén jare joco pegua reta uyeyocui vae reta rami co. ²⁶ Ërei jocua Jerusalén ara pe oĩ vae uyeyocui mbae vae reta rami co. Echa'ã jae yandesí rami co. ²⁷ Echa'ã Tumpa iñee pe uyecuatía oĩ cuarāi:

“Nde nemembí'ã. Ërei iyerovia,
yepē tēi ndepuere'ã etei nenoi nemembirā.
Nde nemembirasi'ã etei. Ërei esapicai ndiyerovia reve.
Echa'ã cuña ime mbae vae güinoita jeta ete imembí cuña
ime reve vae güi.”

Jucuarāi uyecuatía oĩ.

²⁸ Cherivi reta, Isaac oa Tumpa jei ramo. Jae ramíño vi yande ñanói tecove Tumpa jei vae jeco pegua. ²⁹ Ërei jocua cuimbae jei vae jeco peguaño uñemoña vae uyapo icavi mbae vae jocua Espíritu Santo imbaepuere rupi uñemoña

vae pe. Jae ramíño vi añave uyeyapo yandeve jucuarāi.
³⁰ Ërei ḡmbae pa jei Tumpa iñee pe uyecuatía oĩ vae? Jei cuarāi: “Emombo cuña uyeyocui vae jare imembī. Echa'ã cuña uyeyocui vae imembī ndaraū güïnoi Abraham imbaembae. Jaeño cuña uyeyocui mbae vae imembī güïnoita Abraham imbaembae.” Jucuarāi jei. ³¹ Jáeramo, cherívī reta, yande mbaetī co jocua cuña uyeyocui vae imembī rami. Yande co jae jocua cuña uyeyocui mbae vae imembī rami.

5

Cristo yandeyora ma

¹ Yayeyora ma. Echa'ã Cristo yandeyora ma. Jáeramo jecuaeño pipota ete pico uyeyora vae reta rami. Agüiye ye ma pipota pico uyeyora mbae vae reta rami.

² Mase, che jae peve, piñemicircuncidaca yave, pe reta co jae uyeyoraca'ã etei Cristo pe vae rami. ³ Amimbeu ye opaete piñemicircuncidaca vae pe, cua piyapo vae uipota jei piyapota co opaete mboroyocui jei vae. ⁴ Jare cua uipota jei pipota'ã ma Cristo pembujupi vaerā. Echa'ã pipota tēi piyembujupi mboroyocui jei vae re piyapo vae rupi. Pipota'ã ma piyembujupi mbiacavi rupi. ⁵ Echa'ã yande yarovia Tumpa yanembujupi yandepurugüirovia rupi. Jare Espíritu Santo yanemborí cuarāi yarovia vaerā. ⁶ Echa'ã Cristo Jesús re yarovia yave, ñañemicircuncidaca yave mbae'ã co, jare ñañemicircuncidaca'ã yave mbae'ã co. Jaeño icavi Tumpa pe ñanoi yave jocua mburugüirovia umee yandeve mburuau īru vae reta coti vae.

⁷ Tenonde voi peguata cavi co Tumpa coti. ¿Quía pa pembiavai, agüiye vaerā perovia añete vae? ⁸ Echa'ã Tumpa preparavo ma jare umee peve aracuaa, ërei cua īru aracuaa ou'ã Tumpa güi. ⁹ Mboviño levadura uñemai opaete masa rupi. ¹⁰ YandeYa umee ma cheve mbiacatu

peré, quirāi pe reta pepia pe piyeminguetata che chepia pe ayemingueta rami. Aicuaa'ã quía ra co jae pembiavai vae. Êrei Tumpa uiporaracata co chupe.

¹¹ Cheriví reta, che amimbeu'ã etei ūru vae reta pe uñemicircuncidaca vaerã. Echa'ã cherovaicho reta uyapo icavi mbae vae cheve amimbeu'ã ramo. Echa'ã jocua amimbeu yave, ndarau tēi quía chereríro Cristo icurusu regua amimbeu vae jeco pegua. ¹² Quirāi mona uyembisiri reta jocua pemambeco vae reta.

¹³ Añete co, cheriví reta, Tumpa peparavo pico vaerã uyeyora vae reta rami. Êrei agüiye pere piyupe: "Tumpa yandeyora ma. Jáeramo yandepuere yayapo ipotave yaipota vaeño." Agüiye pere jucuarãi. Êrei piyeyocui piyupe, piyerau ramo. ¹⁴ Echa'ã opaete mboroyocui oyovaque cua ndive: "Eau nderapicha nde ndiyerau rami."

¹⁵ Êrei piñerãro yave uyupii, aramoi piñemitarëita.

Espíritu Santo jei vae uyuavi yande yaipota vae güi

¹⁶ Jáeramo che jae peve cua: Pico Espíritu Santo jei vae re, agüiye vaerã pico pe pere vae reño. ¹⁷ Echa'ã peiño pere vae uyuavi Espíritu Santo jei vae güi, jare Espíritu Santo jei vae uyuavi peiño pere vae güi. Mocui reve uyuavi uyugüi. Jáeramo pepuere'ã piyapo pipota piyapo vae. ¹⁸ Êrei pico yave Espíritu Santo jei vae re, mboroyocui mbaeti etei mbaepuere güinoi peré.

¹⁹ Jare jocua mbaeyoa reta yae vae reño yaico yave, yayapo vae uyepocuavi'ã co. Echa'ã yayapo cuarãi: Yayuvanga menda re. Yayapo aguasa. Yayapo pichii vae. Yanembiquere. ²⁰ Yambiadora tumpa-raanga reta. Yayapo paye reta. Ñanemitarëi. Yayovaicho ūru vae reta ndive. Ñanemiaríro. Yandepochi catu ūru vae reta coti. Yaipota mbaembae yandiyupe peguarãno. Yayembiyao ūru vae reta güi. Yarovia moromboe añete mbae vae.

²¹ Ñaneacatāa yanderapicha re. Yapuruyuca. Yasavipo. Uasa ete yacaru. Jare ūru cua nunga icavi mbae vae yayapo. Echa'ā amimbeu ma peve quirāi cua nunga icavi mbae vae jecuaeño uyapo vae reta ndarau yugüireco Tumpa iporoyocuia pe. Jare añave amimbeu ye peve.

²² Ērei Espíritu Santo umee yandeve mburuau, yerovia, mbiacatu, mbiaguasu, mbiacavi, mburugüirovia, ²³ jare ñemimichi. Yayapo icavi vae jare ñañemoa. Cua reta re ipuere'ā etei co mboroyocui. ²⁴ Jare Cristo imbae reta umbai ma jei vaeño. Echa'ā uipota'ā ma tenonde yave uau jare uipota vae reño vae. ²⁵ Echa'ā Espíritu Santo umee tecove ipiāu vae. Jáeramo yaico Espíritu Santo jei vae re. ²⁶ Agüiye yaipota ūru vae reta yanembicate vaerā. Agüiye yayovaicho uyupii. Agüiye ñaneacatāa yandiye.

6

Piyemborimbori

¹ Cherivi reta, ime yave quía uyepocouca mbae icavi mbae vae uyapo yave vae, pe reta peguata cavi Tumpa coti vae piyapicatu piñemimichi reve. Piñemoa ngatu. Echa'ā aramoi aña guasu uipotata vi uyapoca vaerā peve mbae icavi mbae vae. ² Piyemborimbori, tivita poi vae reta piyemborimbori pevoi vaerā rami. Echa'ā jucuarāi piyapo yave, piyapota co Cristo iporoyocui.

³ Ērei ime yave quía uyembutuicha vae, uyembitavi co. Echa'ā jae mbae'ā co. ⁴ Ērei penti penti tuyemboe quirāi ipuere uicuua icavi ra mbaraviqui uyapo vae. Jayave mbaraviqui icavi vae uyapo yave, ipuereta uyerovia jese iyee. Ndarau uipota ūru vae reta umbiyerovia vaerā jese. ⁵ Echa'ā penti penti tuyapo iparaviquii, yepe tēi yavai chupe penti tivita poi vae rami.

⁶ Tumpa iñee re uyemboe vae tumee mbaembae güinoi vae güi oporomboe vae pe.

⁷ Agüiye piyembitavi. Pepuere'ã pembitavi Tumpa. Echa'ã Tumpa umeeta penti penti pe uyapo vae rupi. ⁸ Ime yave quía ico jei vae reño vae, Tumpa ndarau umee chupe mbae icavi vae. Ërei ime yave quía ico Espíritu Santo jei vae re vae, Tumpa umeeta chupe tecove opa mbae vae Espíritu Santo rupi. ⁹ Jare agüiye yandecueri icavi vae yayapo vae güi. Echa'ã Tumpa umbijecoviata yandeve, yandecueri'ã yave. ¹⁰ Jáeramo yandepuere yave, yayapo icavi vae opaete vae pe. Icavi ete co yayapo vaerã icavi vae upurugüirovia vae reta pe.

Pablo uyerovia yandeYa Jesucristo icurusu re

¹¹ Mase, tuicha co cua cuatía reta chepo pe etei aicuatía peve vae. ¹² Uipota uyepiuca ūru vae reta pe vae reta uipota ete piñemicircuncidaca vaerã, agüiye vaerã ūru vae reta uyapo icavi mbae vae chupe reta Cristo icurusu jeco pegua. ¹³ Ërei jae reta etei uyapo'ã mboroyocui jei vae, yepe tēi uñemicircuncidaca reta. Ërei uipota pe reta piñemicircuncidaca vaerã, jae reta uyerovia ete vaerã ūru vae reta jovaque, jucuarãi piyapo yave. ¹⁴ Ërei yandeYa Jesucristo icurusu reño ayeroviata ūru vae reta jovai. Jesucristo re arovia ramo, opaete mbaembae upurugüirovia mbae vae reta ueca vae mbae'ã co cheve. Penti cuimbæ uyecutu curusu re vae umano mbaembæ ivi pegua güi. Jae ramíño vi che aeca'ã ma mbaembæ ivi pegua. ¹⁵ Echa'ã Cristo Jesús re yarovia yave, ñañemicircuncidaca yave mbae'ã co, jare ñañemicircuncidaca'ã yave mbae'ã co. Jaeño icavi Tumpa pe ñanoi vaerã tecove ipiau vae. ¹⁶ Jare opaete cua tecove ipiau vae re yugüireco vae pe tumee Tumpa mbiacatu jare mburuparareco. Tumee vi Israel pegua reta Tumpa imbae vae pe.

¹⁷ Añave güive agüiye quía tachemambeco. Echa'ã cherete re uyecuaa chepere reta. Cua anoi yandeYa Jesús

GÁLATAS 6:18

15

GÁLATAS 6:18

pe ayeyocui ramo. ¹⁸ Cheriví reta, yandeYa Jesucristo
ipiacavi toĩ pe ndive. Amén

Nuevo Testamento Guaraní Pe
New Testament in Guaraní, Western Bolivian (BL:gnw:Guarani,
Western Bolivian)

copyright © 2012 Wycliffe Bible Translators, Inc.

Language: Guaraní, Western Bolivian

Translation by: Wycliffe Bible Translators, Inc.

Guaraní, Western Bolivian [gnw], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Western Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 29 Jan 2022 from source files dated 29 Jan
2022
09a8356f-416c-5877-91cf-40f681db481e